

Siullermeerinnermut UKA2020, imm. 119-imut akissuteqaat:

”Immap naasuinik tunisassiornerup pilersinnissaanut annertusarnissaanullu tunngatillugu misileraanernut aningaasaliissutaasartussat siunertamut tulluarnerusumik qanoq ilusilerneqarsinnaanerat atuutsinneqarsinnaanerallu pilugit nassuiaammik Naalackersuisut saqqummeqqullugit peqquneqarnissaannik Inatsisartut aalajangiiffigisassaattut siunnersuut. Ilaatigut kommunit inussutissarsiortullu misilittagaat nassuiaammut ilaatinneqassapput. Nassuiaat UKA2021 sioqqullugu Inatsisartunut agguaanneqassaaq, taamaalilluni nassuiaammi inerniliunneqartut AIS2022-ip suliarineranut ilanngunneqarniassammata”.

(Parti Naleraq, Inatsisartuni)

Akissuteqaat

(Inuussutissarsiornermut Aatsitassanullu Naalackersuisoq)

Siullermeerinnineq

Naalackersuisut sinnerlugit Partii Naleqqap inatsisartuni gruppia qutsavigissavara aalajangiiffigisassatut siunnersuutaat pillugu.

Isumaqatigaarput qeqqussanik nioqqutissiorneq ineriartorteqqissagatsigu aningaasarsiutigalugulu, qeqqussat iluaqutigineqarnissaat annertuumik periarfissaqarmat. Qeqqussat iluaqutigineqarsinnaapput inuussutissatut, nioqqutissiornermi akuutissatut, uumasunut nerukkaatit aammalu naggorissaatit.

Taamaattumik aamma Naalackersuisut qeqqussanut tunngatillugu suliniutinik assigiinngitsunik aallartitsereersimapput.

Naalackersuisuusut oktober 2019-imi inuussutissarsiornermut tunngatillugu isumasioqatigiissitsipput, qeqqussanut tunngatillugu. Aaqqissuussinermi tassani assigiinngitsunik tunuliaqutaqartut sinniisut 30-it sinneqartut peqataapput, tamatumani aamma Namminersorlutik Oqartussat, kommunalbestyrelsit, suliffeqarfiit minnerusut aamma annerusut, inuussutissarsiornermik siuarsaanermut ingerlatsiviit, aallarnisaasut, ilisimatuut kiisalu aamma neriniartarfeqarnermik inuussutissarsiutillit. December 2019-imi Kalaallit Nunaanni ilisimatusarneq pillugu sapaatip akunnerata naanerani katsersuuttitsinermi Naalackersuisut akisussaaffigaat qeqqussanik katersisarneq aammalu qeqqussanik nioqqutissiorneq pillugu saqqummiineq, - Ilimmarfimmi aammalu Katuami. Augusti qaammat ukioq manna 2020-imi Naalackersuisut innuttaasunut sammititaasumik Nunatta Atuagaateqarfiani qeqqussanut tunngasumik aaqqissuussinermik ingerlatsipput. Tassani aaqqissuussinermi peqataapput suliffeqarfiit aamma aallarnisaasut qeqqussanik nioqqutissiaminnik saqqummiussuisut.

Taamaattumik Naalackersuisut ingerlaavartumik aaqqissuussinernik ingerlatsisarput, aaqqissuussinernilu taamaattuni siunertaasarluni qeqqussanut tunngasunik soqutigisaqartut ilisimasaqartullu katsersuuttsinnissaat, taamaaliornikkullu suliniutinik nutaanik aallartitsisarneq

siunnerfigalugu. Naalakkersuisut naatsorsuutigaat suliniutunik pineqartunik assingusunik suli ingerlateqqinnissat.

Tamatumalu saniatigut aamma Naalakkersuisut neqeroorutigat qeqqussanik nioqqutissiornermik inuussutissarsiortunut tigussaasunik ikiorsiisarnissat. Ingerlatsivippu Innovation Greenland tapiissuteqartarnernik aqqissuussinernik arlaqartunik pilersitsisimavoq, ineriartortitsinermut, pilersitsisarnernut aamma ussassaarisarnernut qeqqussanik nioqqutissiorfinnut tunngasunik periarfissat assigiinngitsut atorlugit ingerlatsisuusumik. Ilaatigut tassaniippu qiortakkanik aqqissuussineq, nioqqutissiassanik ineriartortitsisarnernut tapiissutit aamma nunatta avataanu niuerneruut tapiissutit. Kiisalu aamma aallartinneqarpoq aallarnisaasunut aqqissuussineq, qeqqussanik nioqqutissiornermik aallartitsiniartunut ikiorsiisinnaasoq, ilitsersuisarnikkut attaveqaasersornikkullu suliffeqarfiit nutaat aallarnisarannut atatillugu. Taamaattumillu ullumikkut qeqqussanik nioqqutissiorfinnut assigiinngisitaartunik ilitsersuisarnertsigut ikiorsiissuteqartarnertigullu neqeroorutunik peqarpoq.

Naalakkersuisut aamma kissaatigaat ilisimatusarnernik ingerlatsivinni suliffeqarfinnilu annerni qeqqussanut tunngasunik ingerlatsisoqarnissaa. Taamaattumik Pinngortitaleriffik qeqqussanik nunatsinni peqassusianut tunngasunik ilisimatusarnernik ingerlatsisarsimavoq, aamma qeqqussat qanoq inuussutissartaqassusiat eqqarsaatigalugit, aammalu ilisimasanik katersillutik qeqqussanik naatitsisarnernut iluaquteqartarnernullu qeqqussanik immikkut piukkunnartutut toqqartukkanik, avatangiisitsinni qeqqussanut naajorartunut taarsiullugit periarfissaasinnaasunik. Aamma misissorneqarput qeqqussaniittut akuutissat assigiinngitsut, qeqqussani naatsinneqartuni aammalu nammineq naasuni. Royal Greenland aallartitsisimavoq misileraanermik annertuumik qeqqussanik nioqqutissiorneq eqqarsaatigalugu, tassaniilu maannamut angusat isumalluarnartuupput. 2019-imi nioqqutissiarineqarput qeqqussat 150 kiilu. Taakkua 2020-imi tallimariaataat sinnerlugu annertunerulerput, 998 kiilunik nioqqutissiortoqarmat. Taamaattumillu maannamut suliniummi tassani isumalluarnartumi aallarniutaasut kisiisa takuagut. Ilutigisaanillu Royal Greenland aamma eqeersimaartumik attaveqaqatigiiffinni peqataavoq, qeqqussanik nioqqutissiornermut atatillugu ilisimasat nutaat atorluarneqarfigisaanni. Maanna aallartseruttorpugut suliniutinit annertuunit ilisimasat ingerlatsisunut mikisunut nutaanut ingerlateqqittarlugit.

Uanga suliniutini taakkunani periarfissat annertuutut isigaakka. Qularinngilara qeqqussanik nioqqutissiortunut minnernut ikiorsiissutaasartut ilassusikkat ilisimatusarnermik misileraanernillu annertuunik iluatitsilluarnissamut aqquataajumaartut. Taamaattumik pingaaruteqarpoq maanna aqquutit atuallatatta ingerlavigiinnarnissaa, suliniutillu maanna ingerlasut sunniuteqalersinnissaat, aqquutissatsinnik nalornilersitsiviunngitsunik, nalunaarusiamik utaqqinissaq pissutigalugu.

Siuliani sammineqartut tunngavigalugit Naalakkersuisut inassutigat siunnersuut itigartinneqassasoq.